

「入五」開生日P 真情剖白

千嬅經歷高山低谷 提升能量自救

楊千嬅前日50歲生日，選擇跟歌迷一起度過，舉辦近千人的《MEET YOU AT THE HALFWAY MINI CONCERT 生日限定》派對，除了選唱多首平日少唱的歌，亦分享這幾年的心路歷程，用作鼓勵所有愛她的人，真情流露對話感動全場！

■千嬅真情剖白，多次眼濕濕。

■只要有粉絲支持，千嬅已心滿意足。

由於早前

不少歌迷提出要求跟楊千嬅慶生，故她在短時間內籌備是次生日會，她在台上說：「呢段咁長人生路程，回頭望係非常精彩，亦從冇遺憾。」並獻唱《火鳥》、《直覺》、《孔雀》等歌曲，她說：「今日大家陪我『入五』，我希望用一啲平日冇唱、少唱嘅歌送畀你哋。」繼而再唱《偷生》、《嬋麗緣》、《我是羊》等，之後又跟歌迷傾偈，她坦言這幾年經歷了高山低谷，遇上不少考驗：「新時代網絡風暴係一個好震撼嘅經歷，我乜都遇過晒，幾十歲人我同自己講有咩未見過？真係低處未算低。當我經過呢段日子，發覺自己好強大，今日好感恩，上天畀我有力氣時經歷呢個浩瀚人生。」

「唔好鬧埋我啲朋友」

她分享於低潮的情緒問題：「尤其見到自己啲CD碎到一地都係，個心好痛！我連朋友都唔敢再關注，你鬧我有問題，但唔好鬧埋我啲朋友，諗住一個人撐唔好害人。曾經我覺得好恐怖，所以首先選擇熄機，唔好睇唔好理，休息啦。我點企得番起身？好多人PM我，畀好多鼓勵我，其中有一個歌迷將我多年來上台講嘅得獎感受，剪咗幾分鐘片畀我，好似成3分鐘，我一路睇一路喊，原來我同人講過嘅嘢曾經幫到人，最後幫番我自己。我發現困難時只有係自己救自己，唔好放棄自己。」其真情對話除了搞喊自己，亦感動不少粉絲落淚。


千嬅寄語大家愛錫自己，遇上難關時要提升自己的能量：「呢個係『千嬅群英會』嘅精神，我50歲都做到，你哋咁後生，可以活得更精彩……大家聽住我嘅歌，就可以似我保養得咁好。」全場歡呼拍掌，不過千嬅笑言：「我唔係話保養個樣，係話個腦呀。」笑爆全場。活動完結，歌迷仍不願離去嗌Encore，千嬅跑出來說：「真係唔可以留喇，個場10點門門，我生日剩番兩個鐘，你哋畀我同屋企人、朋友過啦。」歌迷才不捨離開。



■千嬅堅強面對逆境。

胡鴻鈞 計劃開港騷

前晚胡鴻鈞到尖沙咀栢麗大道出席音樂活動，他受訪時表示：「好高興可以喺呢個戶外舞台同大家見面，平時得閒我都去尖沙咀購物。」去年他投放不少時間在內地工作，今年因拍劇關係，會有更多時間留港，更計劃在港開演唱會。提到他日前被拍得猶如小粉絲追球星美斯，他笑言：「好難得球王嚟香港，我咁啱喺佢附近，所以過去追星，雖然冇同佢合照或擺簽名，但唔會失望，親眼見到佢都心滿意足，我有用手機拍低佢入酒店㗎。」



■胡鴻鈞很喜歡在戶外舞台表演。

阿Sa阿嬌咀嘴滿足歌迷

蔡卓妍（阿Sa）和鍾欣潼（阿嬌）前晚舉行的第11場《TWINS SPIRIT 2024 紅館演唱會》是歌迷專場，特別選唱為歌迷而寫的新歌《忠粉》，歌迷的熱情讓她們未唱先落淚，唱畢後二人即拿紙巾不停抹淚，更不約而同說：「太感動！真係要平靜吓先！」不過未幾她們回復平日「癲癲得得」模樣，阿Sa笑言：「我哋不羈係咁，係咪想像唔到呢22年我哋都係咁？哈哈。」此時台下有歌迷狂叫「咀佢」，阿Sa說：「有咩咁特別？又唔係未見過，成日都做㗎啦！」她即拉阿嬌埋身咀嘴，但第一下竟然失手相撞，笑爆全場；第二次則完美咀嘴，全場尖叫聲不絕，阿嬌笑言，「真係無聊呀你哋！見係Fans場滿足你哋啦。」

■阿Sa(左)拉阿嬌埋身咀嘴。



中島美嘉襲港 還原經典造型

日本歌姬中島美嘉出道廿載，前晚首次在香港亞博舉行演唱會，以《AMAZING GRACE》為個唱揭開序幕。當她唱《GLAMOROUS SKY》時，特意穿上當年在電影《Nana》穿過的紅色外套及帽，原來這套服飾她多年來沒再公開穿過，今次特別為香港演出而重現經典造型，為香港樂迷送上驚喜。她還唱出大熱歌曲《雪之華》、《曾經我也想過一了百了》、《Mission》等，與港迷共度歡愉的一晚。



■中島美嘉首次在香港開騷。